

Terzo Premio ex aequo

CARRES DE FEMINA

Ma cantu mi sunt caras
sas carres tuas de fèmina
allumadoras de ganas
e contivizosas
de briones de amore.

Carres chi allatant froes
de misteru aprigu
e de ermosuras antigas
restadas in podèrios de vida
e illieradas prima ancora
chi sa grina primarza 'e sa die
torreret respiru a su mundu.

Arcu paradu de asselenu tundu
sas donosas carres
disizadas in coro
e chircadas cun sa manu
dae sa fortza poderiosa de unu
carignu
chi si aberit durche
che cantu indeosadu de musa
crionzana.

Carres .
chi pedende amore amore dana
cando s'atopant
in filu 'e pessamentu
e a cuncordu nde pesant su tempus
immerrendelu in galanas biadias.

Làgrima durche de late e poesia
sunt sas carres tuas amadas
oh amada mia
chi sempre apo chircadu
e chirco ancora
in sos traghizos de s'anima
in sas prigas de sa vida trampadora
in sos lentolos isfatos
apagados de nuscheles e suores
e in sos ammentos
lastimosos chi dolent
pro su tempus restadu a luna bassa
cando sa note
iscurigosa e muda
torrat sas soledades chi at su coro.